

**Nioqqutissanik eqqussuineq annissuinerlu pillugit
Inatsisartut inatsisaata allanngortinneqarneranik
Inatsisartut inatsisaat
(Ilaasut pillugit paasissutissat
takuneqarsinnaanissaat, timimut scannerut,
umiarsualivinni timmisartoqarfinnilu atortulersuutit
pequtsersuutillu, aningaasat tigatoriaannaat
eqqunneqartut anninneqartullu amerlassusaannik
killiliineq)**

§ 1

Nioqqutissanik eqqussuineq annissuinerlu pillugit Inatsisartut inatsisaanni nr. 18, 30. oktober 1992-imeersumi, ilaatigut Inatsisartut inatsisaatigut nr. 12, 21. maj 2010-meersukkut kingullermillu Inatsisartut inatsisaatigut nr. 5, 15. april 2011-meersukkut allanngortinneqartumi makku allannguutigittinneqarput:

1. § 29-mi imm. 3-tut nutaatut ilanngunneqarpoq:

"Imm. 3. Akileraartarnermut Aqutsisoqarfiup ilaasunik angallasseqatigiiffiit, inuit akitsuuteqarfiusumukarlutik tassanngaanneerlutilluunniit angalasut pillugit paasissutissanik, matumani aamma ilaasunik angallasseqatigiiffiit elektroniskiusumik paasissutissaataannik takunnissinnaanissamik piumaffigisinnaavai. Paasissutissat Akileraartarnermut Aqutsisoqarfiup ilaasunik angallasseqatigiiffiit paasissutissaataannik toqqaannartumik takunnissinnaaneratigut pissarsiarineqartut Akileraartarnermut Aqutsisoqarfiup paasissutissaataasiviinut elektroniskiusumik nuunneqarsinnaanngillat toqqaannartumilluunniit toqqorneqarsinnaanatik."

Imm. 3-5 matuma kingorna tassaalerput imm. 4-6.

2. § 29-mi imm. 7-itut ilanngunneqarpoq:

"Imm. 7. Inuit misissuineq naammassineqartinnagu angallammut isernissaat tassanngaanniillu aninissaat kiisalu nioqqutissanik eqqussinissaq annissinissarlunniit Akileraartarnermut Aqutsisoqarfiup itigartitsissutigisinnaavaa. Aamma angallatip misissuineq naammassineqartinnagu misissuiffiusumik qimatsinissaa Akileraartarnermut Aqutsisoqarfiup ajornartissinnaavaa."

3. § 30, imm. 4, ima oqaasertalerneqarpoq:

"Imm. 4. Inuit akitsuuteqarfimmut tikinnerminni tassanngaaniilluunniit aallalernerminni aningaasanik tigatoriaannarnik 50.000 kr-it nalinginit amerlanerusunik nassataqartut tamatumunnga

kaammattorneqaaqaratik nammineerlutik misissorneqarnissamut saaffiginnissapput aningaasallu tigoriaannaat nassatatik tamaasa akileraaruseriffimmut nalunaarutigissallugit pisussaaffigaat.”

4. § 30-mi *imm. 5*-itut nutaatut ilanngunneqarpoq:

”*Imm. 5.* Inatsisit naapertorlugit inuttut isigineqarsinnaasut imaluunniit inuit aningaasanik tigoriaannarnik 50.000 kr-it nalinginit amerlanerusunik nassiussisut nassittulluunniit, aningaasat tigoriaannaat tamaasa Akileraaruseriffimmut nalunaarutigissavaat kingusinnerpaamik nassiussat akitsuuseqarfiusumut tikinneranni tassanngaanniilluunniit nassiunneranni.”

Imm. 5 matuma kingorna tassaalerpoq *imm. 6*.

5. § 30-mi *imm. 7*-itut ilanngunneqarpoq:

”*Imm. 7.* Misissuineq *imm. 6*-imi taaneqartoq inuk pineqartoq akuersisillugu scannerinikkut pisinnaavoq.”

6. § 32-p kingornanut ilanngunneqarpoq:

”§ 32 a. Akileraaruseriffik imminut aningaasartuutaanngitsumik, umiarsualiviit timmisartoqarfillu nioqqutissanik usingiaaffusartussat usilersuiffusartussalluunniit, imaluunniit ilaasunik nunamut niusiffusartussat ilaasussanilluunniit ikisiffusartussat sananeqarneranni pisatsersorneqarnerannilu immikkut ittunik piumasaqaateqarsinnaatitaavoq.

Imm. 2. Nunani allani sumiiffiit sumiiffillu Kalaallit Nunaanni akitsuuteqarfiusumiittut akornanni ilaasunik angallassisarnissanik pilersitsisoqartillugu ininik pisariaqartunik atortulersugaasunik pisatsersugaasunillu, ilaasut il.il. misissorneqarnissaanni atugassiisoqarnissaa akileraaruseriffiup imminut aningaasartuutaanngitsumik peqqussutigisinnaavaa.

Imm. 3. Sumiiffinni nioqqutissanik usilersuiffusartuni usingiaaffusartuniluunniit, imaluunniit ilaasunik nunamut niusiffusartuni ilaasussanilluunniit ikisiffusartuni akileraaruseriffik akuersiseqqaarnagu aqqutigineqarsinnaanngitsunik assersuisoqarnissaa akileraaruseriffiup im-minut aningaasartuutaanngitsumik peqqussutigisinnaavaa.

Imm. 4. Akileraaruseriffiup pisatsersuinerit *imm. 1*-imiit 3-mut taaneqartut akuerissavai, pisatsersuinissamullu il.il. piumasaqaatit *imm. 1*-imiit 3-mut taaneqartut eqquutsinneqanngippata nioqqutissanik usingiaanissaq usilersuinissarlu kiisalu inunnik nunamut niusinissaq ilaasussanilluunniit ikisinissaq itigartitsissutigisinnaallugit. Taamatuttaaq akuersissut utertinneqarsinnaavoq akuersissuteqarnermut piumasaqaataasut atuukkunnaarsimappata.

Imm. 5. Umiarsualivinnik timmisartoqarfinnilluunniit ingerlatsinerup, sanaartornerup pisatsersuinerulluunniit allannguutaasa akileraaruseriffiup nakkutilliineranut pingaaruteqarsinnaasut akileraaruseriffimmut ilisimatitsissutigineqarnissaat umiarsualiviit timmisartoqarfillu pisussaaffigaat.”

7. § 45 ima oqaasertaqarpoq:

”§ 45. § 1-imi, § 29, *imm. 1, 2, 3* aamma 5-imi, § 30, *imm. 1-3*-mi aamma § 32, *imm. 2*-mi aalajangersakkanik malinnikkumanngitsoq akiliisinneqarsinnaavoq.

Imm. 2. Akileraaruseriffiup § 29, *imm. 6* aamma 7 naapertorlugit peqqusineranik sumiginnaasok akiliisinneqarsinnaavoq.”

8. § 46, *imm. 5*-imi ”§ 30, *imm. 4*”-p kingornanut ilanngunneqarpoq: ”aamma § 30, *imm. 5*”.

9. § 46-mi *imm. 7*-itut ilanngunneqarpoq:

”*Imm. 7.* Inatsisartut inatsisaat maleruagqusat, Inatsisartut inatsisaat naapertorlugu atuutilersinneqarsimasut malillugit akiliisitsisinaanermik periarfissiippat inatsisit naapertorlugit inuttut isigineqarsinnaasok Kalaallit Nunaanni Pinerluttulerinermik inatsimmi maleruagassat naapertorlugit akiliisitsissummik akileqquneqarsinnaavoq.”

§ 2

Inatsisartut inatsisaat 1. januar 2016-imi atuutilissaaq.

Namminersorlutik Oqartussat, ulloq 9. december 2015

Kim Kielsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut